

## JAMES, EDWARD (1839 - 1904), gweinidog Annibynnol

**Enw:** Edward James  
**Dyddiad geni:** 1839  
**Dyddiad marw:** 1904  
**Rhiant:** Margaret James  
**Rhiant:** John James  
**Rhyw:** Gwryw  
**Galwedigaeth:** gweinidog Annibynnol  
**Maes gweithgaredd:** Crefydd  
**Awdur:** Benjamin George Owens

Ganwyd yn Llanfachraeth, Môn, 12 Mehefin 1839, yn blentyn hynaf John a Margaret James, a brawd [O. Waldo James](#). Ymaelododd ym Modedern yn 1853, a chodwyd ef i bregethu yn y Tabernacl, Caergybi, yn 1858, dan weinidogaeth [William Griffith](#). Yn 1859, ar gais ei gyfaill [William Ambrose](#) ('Emrys'), Porthmadog, aeth i'r Gorseddau, ger Penmorfa, Sir Gaernarfon, i bregethu a chadw ysgol i'r gweithwyr llechi. Derbyniodd alwad i Lanaelhaearn a Sardis (Llangybi) yn 1860 ac ordeiniwyd ef i'r weinidogaeth yno, 31 Gorffennaf-1 Awst 1861. Symudodd i Nefyn a'r Morfa yn 1872, ac yno y bu hyd ei ymddiswyddiad oherwydd afiechyd yn 1897. Bu farw 21 Rhagfyr 1904, wedi cystudd maith.

Un o w r enwocaf ei enwad oedd ' James Nefyn.' Gwnaed tysteb enwadol iddo yn 1893, ac etholwyd ef yn llywydd Undeb Annibynwyr Cymru yn 1894. Cyhoeddodd (1) *Ffyddlondeb Crefyddol, sef Pregeth ...* (Bethesda, 1866), a (2) *Amrywiol Bregethau ...* (Dolgellau, 1900), yn cynnwys ei anerchiad i'r Undeb yn 1894 ar ' Yr Annibynwyr Cymreig yn y Dywysogaeth a Threfi Seisonig.'

### Awdur

Benjamin George Owens

### Ffynonellau

O. L. Roberts, *Cofiant y Parch. Edward James, Nefyn* (Merthyr Tydfil 1906), 1906

*The Congregational Year Book*, 1906

*Y Tyst*, 28 Rhagfyr 1904

### Dolenni Ychwanegol

VIAF: [103053521](#)

Wikidata: [Q20732947](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

